

每週經課朗誦經文(巴克禮台語漢字)2013/05/05

共同經課 - 1 使徒行傳十六章九節~十五節

9 保羅暝時看見異象。有一個馬其頓人倚啲求伊講：「請過來馬其頓幫助阮。」10 保羅已經看見異象，阮諸個連鞭意愛欲去馬其頓，掠做是上帝召阮傳福音互 in。11 所以對特羅亞搭船，直直到撒摩特喇，隔日到尼亞坡里。12 對遐到腓立比，就是馬其頓彼地頭一個城，也是羅馬人分設的城。阮佇此個城悒幾若日。13 佇安息日，出城門外，到河邊，拍算佇遐有祈禱的所在，就坐啲及所聚集的婦仁人談論。14 有一個賣紫色布的婦仁人，名呂底亞來聽，伊是推雅推喇城的人，平素敬拜上帝。主開伊的心，互伊專向保羅所講的話。15 伊及伊的家已經受洗禮，就求阮講：「若掠我做真實信主的人，請到我的家住」；就強強留阮。

共同經課 - 2 詩篇六十七篇

1 〔一篇詩歌，交互樂官。用絲弦的樂器。〕願上帝憐憫阮，賜福阮，互伊的面照光阮，(細拉) 2 通互世界知你的道路，萬國中知你的救恩。3 上帝啊，願列邦謳啵你！願列邦攏謳啵你！4 願萬國快樂出歡喜的聲；因為你欲照公道審判列邦，治理地上的萬國。(細拉) 5 上帝啊，願列邦謳啵你！願列邦攏謳啵你！6 地已經出土產；上帝——就是阮的上帝，欲賜福阮。7 上帝欲賜福阮；地的四極攏欲敬畏伊！

共同經課 - 3 啟示錄二十一章十節，二十二節~二十二章五節

我就受神的感動，互伊導去一座山大閣高，將聖城耶路撒冷出佇天裡，對上帝降落的報我看。22 我無看見城內有殿堂，因為主上帝——全能者及羊羔做伊的殿堂。23 城無欠用日抑是月來照伊；因為上帝的榮光照伊，羊羔做伊的燈。24 列邦的人欲倚靠伊的光來行；地上的王欲將 in 的榮光帶來歸佇伊。25 城門日時攏無關，因為佇遐欲無暝時。26 人欲用列邦的榮光及尊貴帶來歸佇伊。27 凡若無清氣的物，以及行可惡白賊的人，決斷袂得入遐；只有記佇羊羔的活命冊的會得入。1 天使閣報我看城內街路中有活命水的河，清亮親像水晶，對上帝及羊羔的座位流出。2 河的雙旁有活命的樹，結十二樣的果子，每月結伊的果子；伊的樹葉做醫治列邦的路用。3 攏無閣有咒詛；是上帝及羊羔的座位欲住佇遐；伊的奴僕欲服事伊，4 也欲看見伊的面。閣伊的名佇 in 的頭額。5 無閣有暝時；也無欠用燈的光及日的光，因為主上帝欲照光 in。也 in 欲做王，到代代無盡。

共同經課 - 4 約翰福音十四章二十三節~二十九節

23 耶穌應伊講：「人若疼我，伊欲守我的道理；我的父欲疼伊，阮亦欲就近伊，閣及伊同倚起。24 無疼我的人就無守我諸個話。閣恁所聽的道理唔是我的，就是差我的父的。25 「我猶及恁住的時，有將諸個話給恁講。26 若是保惠師就是聖神，父佇我的名所欲差的，伊欲將一切的事教示恁，閣欲互恁記得我一切所給恁講的。27 我用平安留啲互恁；我將我的平安賞賜恁。我啲互恁，唔是親像世間啲互人的款。恁的心莫得迫腹，亦莫得驚惶。28 恁已經聽見我有給恁講，我去閣來就近恁。恁若疼我，就因為我歸佇父，恁會歡喜，因為父比我卡大。29 今事猶未成，我已經給恁講，互恁佇事成的時通信。